

宋

史

二八



志卷第五十一

宋史九十八

開儀司上柱國鑾國事司書丞相兼修國史領經筵事都總裁晨晚等奉

敕修

禮一吉禮一

五代之衰亂甚矣其禮文儀注往往多草創不能備
一代之典宋太祖興兵間受周禪收攬權綱一以法
度振起故弊即位之明年因太常博士聶崇義上重
集三禮圖詔太子詹事尹拙集儒學之士詳定之開
寶中四方漸平民稍休息乃命御史中丞劉溫叟中
書舍人李昉兵部員外郎知制誥盧多遜左司員外

郎知制誥扈蒙太子詹事楊昭儉左補闕賈黃中司
勲員外郎和峴太子中舍陳鄂撰開寶通禮二百卷
本唐開元禮而損益之既又定通禮義纂二百卷太宗
尚儒雅勤於治政脩明典章大抵曠廢舉矣真宗承
重熙之後契丹既通好天下無事於是封泰山祀汾
陰天書聖祖崇奉迭興專置詳定所命執政翰林禮
官參領之尋改為禮儀院仍歲增脩纖微委曲緣情
稱宜蓋一時彌文之制也自通禮之後其制度儀注
傳於有司者殆數百篇先是天禧中陳寬編次禮院
所承新舊詔敕不就天聖初王皞始類成書盡乾興

為禮閣新編大率吏文無著述體而本末完具有司
便之景祐四年賈昌朝撰太常新禮及祀儀止於慶
曆三年皇祐中文彥博又撰大享明堂記二十卷至
嘉祐中歐陽脩纂集散失命官設局主通禮而記其
變及新禮以類相從為一百卷賜名太常因革禮異
於舊者蓋十三四焉熙寧十年禮院取慶曆以後奉
祀制度別定祀儀其一留中其二付有司知諫院黃
履言郊祀禮樂未合古制請命有司考正群祀詔履
與禮官講求以聞元豐元年始命太常寺置局以樞
密直學士陳襄等為詳定官太常博士楊完等為檢

討官襄等言國朝大率皆循唐故至於壇壝神位法
駕輿輦伏衛儀物亦兼用歷代之制其間情文訛舛
多戾於古盖有規摹苟略因仍既久而重於改作者
有出於一時之儀而不足以為法者請先條奏候訓
敕以為禮式未幾又命龍圖直學士宋敏求同御史
臺閤門禮院詳定朝會儀注總四十六卷曰閤門儀
曰朝會禮文曰儀注曰徽號寶冊儀祭祀總百九十
一卷曰祀儀曰南郊式曰大禮式曰郊廟奉祀禮文
曰明堂祫享令式曰天興殿儀曰四孟朝獻儀曰景
靈宮供奉敕令格式曰儀禮敕令格式祈禳總四十

卷曰祀賽式曰齋醮式曰金錄儀蕃國總七十一卷
曰大遼令式曰高麗入貢儀曰女真排辦儀曰諸蕃
進貢令式喪葬總百六十三卷曰葬式曰宗室外臣
葬敕令格式曰孝贈式其損益之制視前多矣紹聖
而後累詔續編起治平訖政和凡五十一年為書三
百卷今皆不傳而大觀初置議禮局於尚書省命詳
議檢討官具禮制本末議定請旨三年書成為吉禮
二百三十一卷祭服制度十六卷頒馬議禮局請分
秩五禮詔依開寶通禮之序政和元年續脩成四百
七十七卷且命倣是脩定儀注三年五禮新儀成凡

二百二十卷增置禮直官許士庶就問新儀而詔開封尹王革編類通行者刊本給天下使悉知禮意其不奉行者論罪宣和初有言其煩擾者遂罷之初議禮局之置也詔求天下古器更制尊爵鼎彝之屬其後又置禮制局於編類御筆所於是郊廟禋祀之器多更其舊既有詔討論冠服遂廢鞞用履其他無所改議而禮制局亦罷大抵累朝典禮講議最詳祀禮脩於元豐而成於元祐至崇寧復有所增損其存於有司者惟元豐郊廟禮文及政和五禮新儀而已乃若園丘之罷合祭天地明堂專以英宗配帝悉罷從

祀羣臣大蜡分四郊壽星改祀老人禧祖已祧而復
遂為始祖即景靈宮建諸神御殿以四孟薦享虛禘
祭去牙槃食郤尊號罷入閣儀并常朝及正衙橫行
此熙寧元豐變禮之最大者也元祐冊后政和冠皇
子元符創景靈西宮崇寧親祀方澤作明堂立九廟
鑄九鼎祀熒惑大觀受八寶大祀皆前期十日而戒
凡此蓋治平以前所未嘗行者欽宗即位嘗詔春秋
釋奠改從元豐儀罷新儀不用而未暇也靖康之厄
蕩析無餘南渡中興銳意脩復高宗嘗謂輔臣曰晉
武平吳之後上下不知有禮旋致禍亂周禮不秉其

何能國孝宗繼志典章文物有可稱述治平日久經
學大明諸儒如王晉董弁等多以禮名家當時嘗續
編太常因革禮矣淳熙復有編輯之旨其後朱熹講
明詳備嘗欲取儀禮周官二戴記為本編次朝廷公
卿大夫士民之禮盡取漢晉而下及唐諸儒之說考
訂辨正以為當代之典未及成書而沒理宗四十年
間屢有意乎禮文之事雖曰崇尚理學所謂禮云禮
云玉帛云乎哉蓋可三歎咸淳以降無足言者今因
前史之舊芟其繁亂彙為五禮以備一代之制使後
之觀者有足徵焉

五禮之序以吉禮為首主邦國神祇祭祀之事凡祀典皆領於太常歲之大祀三十正月上辛祈穀孟夏雩祀季秋大享明堂冬至圜丘祭昊天上帝正月上辛又祀感生帝四立及土王日祀五方帝春分朝日秋分夕月東西太一臘日大蜡祭百神夏至祭皇地祇孟冬祭神州地祇四孟季冬薦享太廟后廟春秋二仲及臘日祭太社太稷二仲九宮貴神中祀九仲春祭五龍立春後丑日祀風師亥日享先農季春巳日享先蠶立夏後申日祀雨師春秋二仲上丁釋奠文宣王上戊釋奠武成王小祀九仲春祀馬祖仲夏

享先牧仲秋祭馬社仲冬祭馬步季夏土王日記中
雷立秋後辰日記靈星秋分享壽星立冬後亥日祠
司中司命司人司祿孟冬祭司寒其諸州奉祀則五
郊迎氣日祭岳鎮海瀆春秋二仲享先代帝王及周
六廟並如中祀州縣祭社稷奠文宣王祀風雨並如
小祀凡有大赦則令諸州祭岳瀆名山大川在境內
者及歷代帝王忠臣烈士載祀典者仍禁近祠廟咸
加祭有不尅定時日者太卜署預擇一季祠祭之日
謂之畫日凡壇壝牲器玉帛饌具齋戒之制皆具通
禮後復有高禩大小酺神之屬增大祀為四十二焉

其後神宗詔改定大祀太一東以春西以秋中以夏
冬增大蜡為四東西蜡主日配月太廟月祭朔而中
祀四望南北蜡小祀以四立祭司命戶竈中霤門厲
行以歲冰出水祭司寒及月薦新太廟歲通舊祀凡
九十二惟五享后廟焉政和中定五禮新儀以熒惑
陽德觀帝鼎坊州朝獻聖祖應天府祀大火為大祀
雷神歷代帝王寶鼎牡鼎蒼鼎岡鼎彤鼎阜鼎晶鼎
魁鼎會應廟慶成軍祭后土為中祀山林川澤之屬
州縣祭社稷祀風伯雨師雷神為小祀餘悉如故建
炎四年十一月權工部尚書韓肖胄言祖宗以來每

歲大中小祀百有餘所罔敢廢闕自車駕巡幸惟存
宗廟之祭至天地諸神之祀則廢而不舉今國步尚
艱天未悔禍正宜齋明恭肅通于神明而忽大事弃
重禮恐非所以消弭天災導迎景貺雖小祀未可徧
舉如天地五帝日月星辰社稷欲詔有司以時舉行
所有器服并牲牢禮料恐國用未充難如舊制乞下
太常寺相度裁定省繁就簡庶幾神不乏祀仰副陛
下昭事懷柔為民求福之意尋命禮部太常裁定每
歲以立春上辛祈穀孟夏雩祀季秋及冬至日四祀
天夏至日一祀地立春上辛日祀感生帝立冬後祀

神州地祇春秋二社及臘前一日祭太社太稷免牲
玉權用酒脯仍依方色奠幣以輔臣為初獻禮官為
亞終獻紹興三年復大火祀配以閔伯以辰戌出納
之月祀之二十七年禮部太常寺言每歲大祀三十
六除天地宗廟社稷感生帝九宮貴神高禩文宣王
等已行外其餘並乞寓祠齋宮自紹興以來大祀所
行二十有三而已至是乃悉復之

舊制郊廟祝文稱嗣皇帝諸祭稱皇帝著作局準開
元禮全稱帝號真宗以兼秘書監李至請改從舊制
又諸祭祀辭皆臨事撰進多違典禮乃命至增撰舊

辭八十四首為正辭錄三卷既復命知制誥李宗諤
楊億直史館陳彭年詳定之以為永式祝版當進署
者並命秘閣吏書上親署訖御寶封給之凡先代帝
王祝文止稱廟號凡親行大祀則皇子弟為亞獻終
獻五代以來宰相為大禮使太常卿為禮儀使御史
中丞為儀仗使兵部尚書為鹵簿使京府尹為橋道
頓遞使至是大禮使或用親王禮儀使專命翰林學
士儀仗鹵簿使亦或以他官太平興國九年始鑄五
使印太宗將封泰山以儀仗使兼判橋道頓遞事大
中祥符後凡有大禮以中書樞密分為五使仍特鑄

印景祐二年詔有司皇地祇神州舊常叅官攝事非所以尊神自今命兩省歲九大祠宰臣攝事者叅知政事尚書丞郎學士奉祠於是叅知政事盛度享太廟已受誓戒除知樞密院乃不奉祠又故事三歲一親郊不郊輒代以他禮慶賞與郊同而五使皆以輔臣不以官之高下天聖中乃以翰林學士領儀仗御史中丞領鹵簿始用官次又每歲大祀皆遣臺省近臣攝太尉其後或委他官大中祥符始復舊制又國朝沿唐制以太尉掌誓戒今議太尉三公非其所任請以吏部尚書掌誓戒詔用左僕射闕則用右僕射